



Nihkanapasultipon:

Kanatiyesuwey Yut
Luhkewakon Ci Sipki
Ankeyasik 'Sanaqok
Motutuwakon Kisuwehkasik

Maliseet - Wolastoqiy



nwmo

NUCLEAR WASTE
MANAGEMENT
ORGANIZATION

SOCIÉTÉ DE GESTION
DES DÉCHETS
NUCLÉAIRES



Ktahcuyukepon weci nankomi kehkimsiyeq

Nikanatpaticik Kanatyesuwihkuk kisi pkonomoniya Kanatyesuwey accuwakon weci sipki ankeyutomeq kisaqotek 'sanaqok motutuwakon tuciw June 2007. Pemiyeiwik Adaptive Phased Management cu lihtasu kinkihqok luhkewakon tama utenok weli tahatomuhtit. Nuclear Waste Management Organization (NWMO) apenkasuwok weci panapotomuhtit naka pompawotuhtit psi keq weci peci lessik yut sipki luhkewakon naka pkonomoniya nit uten tan op wolitahatomuht psi keq.

Yut accuwakon wikhasu keq op ahcuwi lessik naka kotuwihuhtit lamik puskonikon weci kisi woli punomuhtit Kanatyesuwey kisaqotek 'sanaqok motutuwakon.

Koti wisoki ksawotu ipocil kci wikuwam tena ahcuwi lihtasu tan op mawsuwuwok kisohehkimsultihtit ciw skitkomiq naka utenol. Epaste oc nit ciw weci piluweyak ona kisohehkimsultihtit, naka mawi asitemtultiniya. Kessok oc ona kotokil luhkewakonol eyik ciw wisokewoluhtit. Sipki oc lukhotuwok.

NWMO 'totoli koseltomuwawa mawsuwinu, mawolukhotimol, naka utenol weci aqami kcicihtuhtit ciw Kanatyesuwey accuwakon tan op wolankuyutomuhtit kisaqotek 'sanaqok motutuwakon. Yaka piyemi nonomuhtit psi keq on oc yaqa 'papehcimaniya utenol weci ahkinuwehtuwahtit eli pawatomuht yut kci luhkewakon. Tan nihtol koti aqami nonomuhtit, mate cuwi psi keq ollukhotiwiyik.

Ciw nikt koti nankomi kehkinsultitit, wikhomuwan:

Jamie Robinson

Director, Communications

Nuclear Waste Management Organization

22 St. Clair Avenue East, 6th Floor
Toronto, ON M4T 2S3
Canada

Tel: 647.259.3012

Fax: 647.259.3692

Email: learnmore@nwmo.ca

Website: www.nwmo.ca/sitingprocess



»» Keq nit kisaqotek 'sanaqok motutuwakon?

Kehsikotonol tuciw Kanatiyesok 'kisuwehkaniya potiyahtuwakon kisihtasik nit 'sanaqok motutuwakon, iyuwok Ontario, Quebec, naka New Brunswick. Kehsok toke kisaqotekil mecal nisonol miliyanol.


Semahtuhtit nit kisaqotek 'sanaqok motutuwakon eyik qasaktihikon nit, qenuk eci 'sanaqok aluwi te samehtasu. Woliw tehp wen mehcine. Naka eci pihce 'sanaqok nehpaawa tehp ona wecuwapasihtit nanatqol nanatqikotonol. Yut weci ahcuwi ankeyasik naka woli punasik askomiw.

Kanatiyesuwey 'sanaqok motutuwakon sankewi woli punasu tokec, nihtool wikuwamol tama etolaqsomuhtit. Otetol Ontario, Quebec, naka New Brunswick etolihtasik potiyahtuwakon, naka Atomic Energy of Canada Limited (AECL) etolokehksultitit Manitoba naka Chalk River eyik Ontario.

Tahalu te kotokil pihcetw eyikil utenol ewekehtit 'sanaqok motutuwakon, Kanatiyesok totoli nikanapasultuwok. 'Totoli tpitahahomuniya tan nit ankeyasu toke naka askomiw. Naka tena wecuwapasultitit ipocil nekoma oc ahcuwi ankeyutomuhtit solahkiw. Psite wen nit ahcuwi tpitahatomon weci kisi wolotakhotiyeq ciw mawsuwinuwok naka ktahqomiq. Cuwi koluwot keq ollukhotiyeq.



Kanatiyesuweyal motutuwakonol kisaqotek lamiw CANDU sapskot tuciskekon ehpaasi mitol naka qocitkikon nisinsk cel nan.



Toke kisaqotek 'sanaqok motutuwakon ote lamiw olonaqeyal paksol eyik Ontario Power Generation's Western Waste Management Facility

Kanatiyesuwey Accuwakon

June 14, 2007 Nikanatpahticik Kanatiyesok 'kisitahtomuniya
Adaptive Phased Management weci skat utomeyuwahtit
mawsuwinu naka skitkomiq naka weci ankeyutomuhtit kisaqotek
'sanaqok motutuwakon.

Adaptive Phased Management nit piyemi wolessu ci etoli accikotonahtit
mawsuwinuwok, weckuwaspasihitit ktahcuwi nisuluhkaman weci kisi ankeyutomeq
Kanatiyesuwey kisaqotek 'sanaqok motutuwakon.

Yut acuwakon itomuwiw eli sanaqok motutuwakon ahcuwi otek lamkik puskonikon
ponapsqihkuk. Kenuk yut acuwakon cuwi nonasu pomi nankomapasultihitit. Cuwi
accessu nituwihtit.

Adaptive Phased Management

- » Tehpu tehq pesqon koti otek weci puskonomuhtit kisaqotek 'sanaqok
motutuwakon. Nit oc lamkik ponapsqihkuk.
- » Mesq nit ihit, cuwi nihkanapasuwok naka tpitahasiniya sipki tokkiw otek.
- » Koseltomuwaninya mawsuwinuwok naka utenol weci nonamuhtit keq koti
lessik.
- » Ahcuwi mahkiyew puskonasik, cu koseltomuwaninya.
- » Wolessu op kisi sipki ankeyasik kisaqotek motutuwakon.
- » Wesuwe koti naciptuhtit nit kisaqotek motutuwakon 'kisihp wihqehtuniya
ciliw tawi piyemi ankeyasik.
- » 'Punomoniya man naka sipki 'tapenkanomoniya wec nit kisi woli
ankeyutomuhtit kisaqotek 'sanaqok motutuwakon.

Adaptive Phased Management nit kisi lihtasu tuciw Kanatiyesik kisi maqahawolotihitit naka nisewestuniya. Tahalu te nit kisi lessik wahta pilw kis etoli luhkatomuhtit nit 'sanaqok motutuwakon, Sweden, United Kingdom, Finland, naka France. Nihkanitahasuwiw nit Adaptive Phased Management weci sipiki ankeyasik kisaqotek 'sanaqok motutuwakon. Nit eli pawotomuhtit Kanatiyesok weci kisessik naka wolessik.





Luhkewakon Wikhasik

Kinkihkon yut luhkewakon naka motuweyu, tahcuwi lihtuniya puskonikon lamkik naka wikuwam tan op wisoki kcicihtuwinuhticik koti lukhotihtit. Ahcuwi ote tama utenok wolitahatomuhtit.

Yut lamkik eyik puskonikon ote weci kisi sankewtek kisaqotek 'sanaqok motutuwakon sipkiw. Tolihtuniya oc waloq 500 mitolol ekitasik, Ktahqomiq koseltomut. Ote oc nit kessok lamsaqol nit punasik. (lapotomun yet niqiw)


Kisaqotek 'sanaqok motutuwakon oc punasu lamiw yuhtol kisihtuhtit ciw nit, sakoleyik olonahqeyal paksol. Toliptuniya oc nit puskonikonik tama apc eyik kotokil paksol cuwi pisi punomuhtit. 'Temehki punomoniya oc nit lamkik naka 'toliptuniya oc pesq lamsokuk. Ote oc nit waloq ponapsqey naka 'tosehkehtuniya nit lamiw. Tupqan oc ona punasu weci ska suhkolihekk, kis yut 'kisi toqecehtuniya piliw, nit piyemi wolessik.

Yut kisaqotek motutuwakon oc topinomuniya kekiw. 'Kisi oc apc naciptuniya koti nit ollukhotihtit solahkiw. Matec kopotehtasiw yaka uten, NWMO, naka nikt nihkanpawotuhtit wolitahatomuhtit. Mehc otec kenoq tpinasiw.

Psite yut luhkewakon, pemiptasik kisaqotek motutuwakon eyik tokec tokkiw koti pisi punomuhtit, oc ankeyasu, nikt Canadian Nuclear Safety Commission (CNSC) koti tpinomuniya qeni nit otek – 'cimaciw etoli lihtasik, etoli pompawotasik, tokkiw conehtuhtit. Yut luhkewakon cuwi koluwt ciw wolomulsuwakon, sankewte naka ma 'sanaqotu ciw Kanatiyesok naka skitkomiq. Cuwi ten skat tuwehkawoniya ciw matonakhotimok.

Ote oc ona nit wikuwam ciw kisokehksultihtit ciw kamputulol, skitkomiq, naka utenol. Yut oc etoli nisoluhkamahtit kotokik etolokehksultihtit piluwey.

Yut wisuki ksawotik luhkewakon 'koti sipki luhkekhewa wisokeluhtit mawsuwi ewikihtit nit utenek naka wecuwaw. Nisolukhotuwok oc sipki nit uten, wecuwaw naka NWMO weci woluhkewik psi keqsey.



»» Elipkonasik Uten

Tan op eli pkonkonasik uten koti otek nit puskonikoniq, weci sipki ankeyasik kisaqotek ‘sanaqok motutuwakon Kanatyesuwihkuk; yut ote weci woli ankeyasik kessok ahcuwi lapotomuhtit naka wolitahatomuniya.

Elapotomeq keq Kanatyesok itomuhtit, yut eli pkonasik uten cuwi mawi wolitahatomonen psite kilun. Cuwi nuhsuhkmonen woli pomiyeuik yut Kanatyesuwihkuk. Peciyeuikol yuhtol kisi panapotomeq tan piluway kisi lessik. Yut oc kilun nuhsuhkomeq.

NUHSUHOMEQ WOLIPOMIYEWIK

Cuwi Sakolomomqot

- » Tomk mawsuwinuwok naka skitkomiq ahcuwi ankeyasuwo.
- » Ahcuwi olukhotimok knuhsuhkmonen.
- » Piyemi kcicihtasik oc wehkiyeq.

Nihtol utenol ‘tahcuwi wolitahatoniya psi keq

- » Nit uten tan cuwi pecitahatomuniya eli nekomaw koti wihqehtuhtit yut luhkewakon.
- » Tehpu te nihtol utenol oc pkonasik ciw yut luhkewakon.
- » Nihtol tena utenol kisi ehqi nisolukhotuwok, katop ‘kisehtuwawoniya.

Sipki nulankeyuwantomen nit uten

- » Nit uten cuwi apenkuwawa man.

Cuwi Kotokil utenol topitahaman

- » Papehcikesuwakonol naka tomitahsuwakonol cuwi asitemtuwasuwol ciw nihtol uten wecuwaw ipocil pomoqitupon oc nit.
- » NWMO tena oc topitahamawa nikanatpatomuhtit nit Ktahaqomiq.

Cuwi skicinuwo naka tepeltomuhtit ankeyasu

- » Eli koti ankeyutomeq skitkomiq naka mawsuwinuwok, cuwic tena skicinuwo. Yut luhkewakon cuwi tpitahatomuniya eli yut skicinuwhkuk nake eli tpeltomuhtit ewikultitit ci ka ska nikanatpahticik wolamsotomuhtit.

TPASQOTIKONAL ELAPOTOMASIK

Yut keti nuhsuhkomeq kisi accehtasu pawotomuhtit mawsuwinuwok pawotomuhtit.

Aceyipon	NWMO kisuwikhomoniya tan op nankomapsiniya. Kisi milaniya nikanatpahticik cipenuk naka Kanatiyesuwihkuk, skicuwi mawolukhotikonol, naka Kotokik ahcuwi kcicihtutit.
Amsqahsewey	NWMO mace kehkimawa kotoki, 'tasitemawa papehcikessihtit, naka 'tiyawa keq koti ollukhotihtit.
Nisewey	Utenol cuwi yuhukun eli koti aqami kcicihtutit ciw keq pawatomeq.
Nuhuwey	Nikt keti kcicihtutit oc mace nonuwan naka papehciman keq nit eyik nuluwiw.
Newey	Nikt keti kcicihtutitit naka nikt wecuwaw ewikihtit papehciman weci maqahawolotihtit naka topitahatomoniya keq op lessik.
Naney	Uten tan op keluwahk ciw nit pukonikoniq cuwi pecitahasultuwok eli koti ihihtit nit luhkewalon.
Komahciney	NWMO naka nit uten mawi pecitahasihtit mace nisolutukhotuwok.
Oluwikoney	Kotokik nikanatpahticik ona tahcuwi nonomoniya eli yut uten keluwahk naka wolitahatomiya mesq psi wen mace luhket.
Oqomulciney	Mace lihtasu oc psi keq wikuwamol naka tusanol.
Eqonatekuwey	Lihtasu naka pompawotasu.

Yuhtol koti nuhsuhkomuhtit apc otel wikhikonok eliwhtasik "Moving Forward Together: Process for Selecting a Site for Canada's Deep Geological Repository for Used Nuclear Fuel", ote ten kompiyutolok kosona kpocitahkewkuniya.



Wolankeyasuwok Mawsuwinuwok naka Ktahqomiq

Tan te uten pkonasik weci yut puskonikon inihtit ahcuwi koluwot weci kisi sipki pisehtasik kisakotek 'sanaqok motutuwakon. Nit oc ahcuwi sakolinaqot weci skat wapolessik keqsey. Cuwi psi wen ankeyasu weci koluwahk cimaciw toke tokkiw wecuwapasihtit pomawsultitit.

Weci kisessik nit lamkik puslonikon naka sakolonasuwol nihtol kisaqotek 'sanaqok motutuwakonol, cuwi op kocichtuniya tan likon nit piyemiyak, tan eli wissekonasik, naka tan tucikolowot nit pomapsqihkuk woloq eyik.

Nit ehtek ahcuwi qecehtasu apc qecehtasu tokkiw ote psi qecehtasultitit wolitahatomuhtit. Cuwi kehkimultuwok, naci panapotomuniya, naka woli kcichtuniy eli psi keq koluwok mesq keq lihtasik. Yuhtol ahtoli qecehtuhtit tokkiw psi te wen wolitahatok.

Nit koti otek ponapsqihkok kolowot ktahkomiq, ma samqaniw, ma otew olonahqey kosona kotokil motutuwakonol tehpu te ponapsqey pawotomuhtit nikt Canadian Nuclear Safety Commission naka elokimiht International Atomic Energy Agency. Nekomaw kecichtuhtit tan oli pomiyewiw piluwi skitkomiuk.

Papehcikesuwakonol 'tasitemtomuniya:

- » Koluwot nit ponasq eyik weci sipki sakqonasik nit kisaqotek 'sanaqok motutuwakoney weci skat utomeyawotasik ktahqomiq naka mawsuwinuwok cikawote ehsaqiw keq lessik?
- » Koti nit ponapsihkuk sankewote wisoki sipkiw cikawote metkomikessik kosona apc pitoki puniwick?
- » Wolahte nit weci kisi sankewi lihtasik puskonikoniq, pompawotasu naka nokka kpahasu?
- » Kisi op kotokik mawsuwinuwok ksiyapasuwok solahkiw tahalu koti laloqikahtit ciw olonahqey?
- » Kisi op wolinomomonen nit ktahqomiq eyik weci nomihtuweq eli op sipki otek nit punomeq?
- » Kisi op sankewi peciptunen nit kisaqotek 'sanaqok motuwakon nit puskonikoniq koti otek?



Sankewawtultuwol Utenol

NWMO itomuk eli oc sipku wolankeyutomuhtit nit uten tan koti ihihtit nit puskonikon, qeni lihtasik cu psi keq woli pomiyewiw ciw psi te wenik.

Yut luhkewakon koti pompawotasu weci sipki wolessik ciw psi mawsuwinuwok naka ewikihtit. 'Papehchimawa oc keq nituwihtit naka keq koti ollukhotihtit. Yuhtol tahalu:

- » Weci kisi paqatuhtit man
- » Ktahqomiq
- » Weci wolessik naka kisesik pompawotasikil
- » Skicinuweyal
- » Cocahqeyal
- » Weci wolawsultihtit
- » Peciyewewiwol wolelomoqakonol

Yut luhkewakon otek cu peciptahsu kotokil luhkewakonol naka man ciw nit uten, naka wiwoniw ewikultitit. Elkihqok kenuk yut naka sipkiw, cipotu keq lessu, nit weci ahcuwi sankewi pomawotasik. NWMO 'koti nisuluhkamawa nihiht mawsuwinu. Nit tehcyihtit qeni lihtasik.

NWMO 'koti nisuluhkamawa mawsuwinu weci toqite nomihtuhtit keq koti lessik naka tan oc 'toli wicuhkemaniya qeni yut lihtasik. Koti kehkimaw keq op kisi lessik tahalu yuhtol:

- » elomulsultihtit naka elankeyasultihtit mawsuwinuwok
- » elomikok toqite skitkomiq naka yut ketowihtasik
- » qihiw naka piluwiw elukhotihitit naka paqahthsitit
- » uten pompawotasik naka tan pacitahasultihtit
- » weci skat wapolessit tan elawsultihtit naka skat ktoqessuwiw
- » skat tomeyutomuwoniya weyossisuk ewikultihtit naka tama otoli imiyawolotihitit
- » Keq op wikuwamol nituwihtit weci luhkewakon woli pomeyewik
- » Tan op tahcuwi accessuwiw psi keq qeni lihtasik nit puskonikon
- » Keq op ahcuwi lihtasik (awtil, ankasuweyal, sipol) naka wikumol weci peciptasik nihtol keqil ahcuwi ihihtit qeni luhkamok, naka weci paciptuhtut nit kisaqotek 'sanaqok
- » Nihtol NWMO ahcuwi ihitit naka lihtuhtit weci kis pomawotasik naka psi keq wolessik. Wenik oc petapasitit naka nit tolukhotiniya

Wen Nilun?

Tuciw 2002, Nuclear Waste Management Organization (NWMO) kisihtasu, nikt Ontario Power Generation Inc. (OPG), Hydro-Quebec, naka New Brunswick Power Corporation 'kisihtuniy ipocil Kanatiyesuwey Nuclear Fuel Waste Act (NFWA). Kosehtuwaniya weci sipki ankeyutomuhtit kisaqotek 'sanaqok motutuwakon.

Nit NWMO etololukhotihtit mawsuwinuwok woli kcicihtuhtit, tahalu nutoluhkamat mawsuwinuwok, nuci testomowehtuhtit ktahqomi, nutewestuwamahtit mawsuwinuwok, nutankeyutomuhtit man, naka nuci pompawotahsihtit. Kehsihtit nisoluhkomahtit tahalu nucinisoluhkatit, nuluwi luhkhotihtit, naka nutokehkimisultihtit. Toqite Kanatiyesuwihkuk naka piliuway tama. Ciw yut weci psi woli kcicihtuhtit keq wolessik naka kisessik.

Kanatiyesuwey sipki ankeyasik 'sanaqok motutuwakun weci kis wolankewuwahtit mawsuwinu naka skitkomiq tokec naka askomiw.



NWMO 'tihiniya nanol welessikil:

- » **Woleyuwakon** Nulawsipon oc weci kisi woleyuweq kotokik, mate oc pakotahsiw, psi te oc wen nuleyuwa.
- » **Piyemi wolessuwik** Ntokehkims oc keqil piyemi wolessik, tawitahsuwakonol, naka piyemi kocihituwakon weci kisi sankewoluhki.
- » **Nisuluhkaman kotokik** Koti nisuluhkamak kotokil utenol naka masuwinuwoq weci kisi nutuwok naka nostomonon tan elitahasihtit. Nisewestupon oc weci wolessik ciw toqite nilun.
- » **Wolotahk oc** Wapolessik keq, nil oc aqimki. Nil nit ahcuwi tpinom weci psite keq woli pomiyewik, naka wolessik.
- » **Esankopotas oc** Matec keq olluhki katuwon. Psi tehc Kanatiyesok kocichtuniya keq iton, keq kisitahatom, naka keq kisi luhkatom.

Ankeyasik nit kisaqotek 'sanaqok motutuwakon koti sipkiyewiw. Kessok ahcuwi kocichtuweq naka lukhotiyeq. NWMO koti tpostuwawa mawsuwinuwok naka nisuluhkamaniya Kanatiyesok. Toqite 'cuwi niktanapasultipon, nisewestultipon qen pimiyewik psi keq. Kilun yut ewikultiyeq.



FAQs

Keq nit Kanatyesuwey luhkewakon ci sipki ankeyasik 'sanaqok motutuwakon kisuwehkasik?

Tuciw 2007, nikanatpatomuhtit Kanata kisi pkonomiya Adaptive Phased Management weci kisi sipkiw ankeyuwahtit mawsuwinu naka skitkomiq. Yut oc yaq elehtasik kisaqotek 'sanaqok motutuwakon. 'Koti puskomuniya walokuk kenoq ahcuwi lihtasu wikuwam weci kisi tpinomuhtit nit puskonikoniq. Sipkiw, tehc mesq psi kisehtasik. Tahcuwi wolitahatomuniya ewikihtit nit utenek ipocil nekoma oc wewomotomuhtit. Cu kenuk wicuhkemawa kcicihtuwinuhticik.

Wenik apc yut etoli ollukhotihtik piliw?

Wisokeluk piluwiw kis etoli luhkatomuhtit yuhtol puskonikonol. Ankuc keka kiseyuwuk. Kantiyesok tolapomawa ci keq wolessik. Nit oc ona nekoma elluhahtit. Tahlu te Sweden, Finland, France naka United Kingdom.

Keq ahcuwi lihtasik ciw yut luhkewakon?

Ahcuwi lihtasu puskonikiq tan op kisi punomuhtit nit kisaqotek 'sanaqok motutuwakon, ahcuw waloq 500 mitolol lamiw skitomihtuk. Ahcuwi ona nit otetol wikuwamol ciw nikt etoli tpinomuhtit nit puskonikon naka ciw utapakononol ewehketit. 'Koti na kehkimawa kotoki tan psi pompawtusu.

Kehs oc motahkomiq ewehketit?

Ciw yut luhkewakon nituwiniya oc 100 hectares (250 acres) ci lihtasik wikuwamol naka tusanol. Ciw puskonikon nituwiniya waloq 2.5 kilometers pihuwuw naka 1.5 kilometers skekiw (375 hectares/930 acres). Lamkik oc 500 meters.

Kehs oc utapakonol nituwihtit?

Weci nit macehtasik kosona peciphasik ahcuwi nihtol kisaqotekil 'sanaqok motutuwakonol liptasuwal nit puskonikonok. Tama nit otek cuwi oc wehkasuwol awtil, ankasuweyal, naka wanokinol. Wehkasuwol kenoq kis yuhtol. Cu kenoq wisoki ankeyasultuwok nit pemiptasik. Nit eli pawatomuhtit Transport Canada naka Canadian Nuclear Safety Commission.

Tan oc oli ankeyasuwoq mawsuwinuwok naka kci kikuwosson?

Kehsok ahcuwi lessik weci kisi nit ankeyasik 'sanaqok motutuwakon. Nit puskonikon naka pisi punasikil wolihasuwal weci kisi kapuwitasik tan op wopolessik. Nit puskonikon ahcuwi ote ponasqihkuk lamiw skitomihtuk. 'Punomoniya oc nit keqsey kisi pukonasik nihtol paksisol. Kis nit kisi qecehtuniya piliw, kisessu, neqt nit lamiw otek on oc apc topinomuniya.

Tan oc toli tpinomuniya?

Yut luhkewakon ahcuwi wisoki tpinasu. Weci kisi sankewi tahasultihit mawsuwinuak naka weci skat toneyuwut kci kikuwosson, tokec naka askomiw. Nit oc Canadian Nuclear Safety Commission ahcuwi lukhotihtit, naci oc panapotomuniya weci psi keq kisessik naka wolessik, qeni pompawtasik. Nekoma ahcuwi woleyutomuntit psi keq. Nikanatpahtitit Kanatyesok, ewehketit Natural Resources Canada topinuwawa NWMO weci lukhotihtit keq 'Nuclear Fuel Waste Act' itonuwik.

Tan toli pecitahatomuniya eli koti pkonumuhtit uten tama nit puskonikon koti otek?

Nisikotonol, kisi papehchimawa Kanatiyesok tan op 'toli pkonomoniya nit uten. Kehsihtit kisi milahtit NWMO tan elitahasihtit, cuwi yaq leyu, ma pakotahsiniya naka ma pahculaniya, tahcuwi yaq psi wen kocicihtun keq pemiyeuwik. NWMO ci kehkimuwok nikt kotokik kisi pkonomuntitit pilw naka yut ewikultiyeq.

Kis NWMO kccicihtuniya tama yut puskonikoniq koti ote ciw yut luhtewakon?

Ontama. 'Totoli toke kiluwatomuniya nit uten tan op nit koti otek. Kenok nikt mawsuwinuwok ahcuwi liyamahtit. Mate nekoma koti kosehtuwawoniya wen. 'Tokehkimawa oc koti aqami kcicihtuhtit ciw NWMO, Adaptive Phased Management naka puskonikoniq ciw 'sanaqok motutuwakon. Koti kcicihtuhtit, mate tahcuw ihiwoniya.

Kis NWMO kocicihtuniya tama op skat kisi otek?

Ntama. Kehsok Kantiyesuwihkuk tan op nit kisi otek naka sankewi tpinasu. Kenuk tahcuw woli kcicihtuniya saku pol ahcuwi testomuwehtuniya ktahqomiq nit ponapsqihkuk, mesq keq elihtasik.

Keq op wolessik ciw nit uten naka wiwoni ktahqomiq koti ihihtit yut luhkewakon?

Cu sipki nisolukhotuwok uten, wiwoni ktahqomiq, naka NWMO. Toqite oc ankeyasutultuwok naka wicuhkemtuwok. Etoli lihtahisik nit, wisokeluk oc sipki lukhotihtit naka paqahuniya man.

Tan oc yut luhkewakon lapenkasu?

Nuclear Waste Management Act papehcikesuwiw weci nihkani tahatomuhtit keq koti lessik, keq koti ollukhotihtit, naka keq koti luhkatomuhtit. 'Tapenkatomuniya oc nikt tepeltomuhtit kisowehkasik 'sanaqok motutuwakon yut Kanatiyesuwihkuk: [Ontario Power Generation, NB Power, Hydro-Quebec, naka Atomic Energy of Canada Limited]. Yuktok tahcuw wolipunomoniya man ehtahsi apcikoton weci kisapenkasik psi keq ahcuwi luhkasik. Ahcuwi tena NWMO toluhkatomuniya keq ahcuwi luhkasik naka kehs op psi keq lawotik, naka 'tiyaniya niktok kehs ahcuwi woli punamuhtit.

Tan op toli aqami kcicihtun keq nit Kanatiyesuwey luhkewakon ci 'sanaqok motutuwakon?

NWMO totoli papehchimawa mawsuwinuwok, mawolukhotihtit, naka utenol weci kakalumahtit koti kcicihtuhtit tan oc oli wehkasu kis kisaqotek 'sanaqok motutuwakon. Koti nekomaw puskonomuhtit, tokehkimawa oc keq ahcuwi lessik. On oc 'papehchimaniya koti nakomiw lukhotihtit naka 'tolihtuniya nit pukonikon.

Koti aqami kcichtuweq ciw yut psi, kakalaman:

Jamie Robinson, Director, Communications

Nuclear Waste Management Organization
22 St. Clair Avenue East, 6th Floor
Toronto, ON M4T 2S3, Canada
Tel: 647.259.3012 Fax: 647.259.3692
Email: learnmore@nwmco.ca
Website: www.nwmco.ca/sitingprocess



NUCLEAR WASTE MANAGEMENT ORGANIZATION SOCIÉTÉ DE GESTION DES DÉCHETS NUCLÉAIRES

www.nwmo.ca/sitingprocess

For more information, please contact:

Jamie Robinson Director, Communications
Tel 647.259.3012 Fax 647.259.3692
Email learnmore@nwmo.ca

Nuclear Waste Management Organization

22 St. Clair Avenue East, Sixth Floor
Toronto, Ontario M4T 2S3 Canada
Tel 416.934.9814 Toll Free 1.866.249.6966
www.nwmo.ca

